

Mud Volapüka

Nüm 16

22 yulul 2016

Bukemaboed

„Glumaladäl“ fa hiel „A. P. Cehov“

Soaralulit. Nif gretik luimik trögiko ziviron nilo lampads pefilidöl änu e falon asä jüd müdik mägik sui nufs, jevodabäks, jotis, lühäts. Bökan ‚Iona Potapov‘ binom vietik löliko äsä späk. Eblotikom mögiküno pö koap, seadom su bök e no mufom. Ed igo if nifakum lölik ufalonöv sui om, no ulecedom-la zesüdik ad delemufükön nifi de ok... Jevodil oma i binon vietik e nemufik. Me nemuföf, gulöf fomas e sted staföfik lögas okiks igo niliko sümedon jevodil pitakekik nejerik. Mögiküno, tikon. Kel pediton de plaud, de mags komunöfik dumik e pepladon isio in jenöf at pefulöl me fils mostöfik, krot nejafovik e mens rönöl, pro ut no mögos ad no tikön...

Hiel ‚Iona‘ e jevodil oma no mufons ya lunüpo. Idetävons de yad igo bü fided, ab gaenod no nog süikon. Ab, ekö, fog soarik nexänon sui zif. Pael filas lampadas leleton pladi okik kölame liföfik e dajäf süta vedon laodikum.

„O bökan, lü süt ‚Viborgskaya‘!“, hiel ‚Iona‘ lilom. „O bökan!“
‚Iona‘ edremom demü jek e logom, da logahers pitegöl fa nif,

militani in mäned ko kapütül.

„Lü süt ‚Viborgskaya‘!“, militan dönuom. „Slipol-li? Lü el ‚Viborgskaya‘!“

‚Iona‘ siom tirülölo fränis, sekü atos de bäk jevoda e jots oma jüds nifa falons... Militan seidom oki ini slifavab. Bökan klikom me lips, tirom särvigü äsä svan, löikom e, mödadilo plu demü geböf ka neod, kledükom batüli. Jevodil i tiron särvigü, krugükon lögis okik staföfik e dotiko lüodon...

„Kiöpio jutol, maleditilö!“, ‚Iona‘ lilom primo vokädis leskana de lefogalemödot dagik muföl usio ed isio. „Kiöpio jutol? Mufolöd detio!“

„No kanol-la bökavabön! Mufolöd detio!“, militan tirädikon.

Bökan bökavaba zuneton. Beigolan, elovegöl vegi ed ejoköl me jot ko lemudiär jevodila, logedon biedälisko e sejedon nifi de sliv. ‚Iona‘ mufedom su bök, äsvo su nadis, jokom me kubits züöpio e logedon me logs äsä lienetan, äsvo no suemom kitopo binom e kikodo papladom iso.

„Valikans binons lumans kion!“, militan cogedom. „So nebönons ad kobojoikön oli u reafön oki disi jevod. Plotons.“

‚Iona‘ pödiologom lü tävan e mufom lipis okik... Vilom-la spikön bosü, ab de gug oma nos plödikon plä raudam.

„Kis?“, militan säkom.

‚Iona‘ steifom ad smililön, tutöbidom gugi okik e raudom: „Pö ob, o siör ... son ideadom avigo.“

„Jö!... Kikodo ideadom?“

‚Iona‘ pödiavirom me koap lölik oka lü tävan e spikom: „Kin nolon atosi! Niludo demü fif... Ätopom tö malädanöp ünü dels kil ed ideadom

... Vil Goda.

„Yilolöd, o diabikan!“, vokädoy in dag. „Logolöd vegi keli bevegol!“

„Bevegolös, bevegolös...“, tävan spikom. „U no ulükö mobs-la jü odel. Spidolöd!“

Bökan dönu tirom särvigi, löikom e ko fein vetöfik fänülom bati. Dönuamo posä pödiologom lü tävan, ab etan efärmükom logis e, niludo, no vilom ad dalilön. Enexänölo omi tö süt ‚Viborgskaya‘, estobom nilü pöb, blotikom su bök e dönu no mufom... Nif luimik dönu vietükon omi e jevodili. Döp bal pasetikon, döp sököl i...

Su pärunaveg yunikans kil bestepoms, tagölo laodiko me gumajuks e vüzanölo. Tel onas binoms geilik e mägik, kilid binom lövik e gobadik.

„O bökan, lü el ‚Pon poldanefik‘!“, gobadan vokädom me vög noidülöl. „Mens kil... könäd mö tsyärvonätazims tel!“

‚lona‘ tirom fräni e klikom. Tsyärvonätazims tel no binons suäm gidöfik, ab no demom suämi... U va ruab bal u va tsyärvonätamims lul — atos lindifon pö om, bisä tävans dabinonsöv... Yunikans, runädölo e blasfämölo, nilikoms lü slifavab e leigüpo löpikoms sui seadöp. Tuvedam säkäda primikon: kims tel odalons ad seadön e kim omutom stanön? Pos zan, vimädam e blams luniks, dagetoms kludodi, das gobadan mutom stanön as lövikün.

„Gö, föfiomofolöd!“, gobadan noidülom, fimükölo oki e natemölo lü nük hiela ‚lona‘. „Bataflapolöd! Ö, luhäti kion labol, o flenädan! No mögos ad tuvön badikumi pö el ‚Peterburg‘ lölik...“

„Ka-ag... ka-ag...“, ‚lona‘ smilom. „Te soik dabinon...“

„He, o ol, el „te soik dabinon“, föfiomofolöd! Oveigom so-li pö veg

lölik? Si-li? If flap-li sui särvig?...”

„Kap dolon...“, bal lunikanas spikom. „Ädelo pö els ‚Dukmasovy‘ obs tel kobo hielil ‚Vasiliy‘ ifidrinoms fladetis fol konyaka.

„No suemob, lü kis lugön!“, lunikan votik tirädikom. „Lugol, äsä jäpan.

„God pönonös obi, ifü atos no binon verat...”

„Atos binon verat maä, das puf kögon.“

„Ka-ag!“, ‚lona‘ grinedom. „Hisiörs kiom le-efredik!”

„Fi, maleditilö!...” gobadan leskanikom. „Uvifikumol-li, o jäpan? Voiko-li vaboy soiko? Gö, ubataflapolös jevodi! Föfiö, maleditilö! Föfiö! Bataflapolös oni gudiko!

‚lona‘ senälom po bäk okik koapi mufedöl e dremäl vöga gobadana. Lilom darori palüodöl lü om, logom menis, e senäl soalikama pianiko primikon ditön de om. Gobadan äzunetom jüs eteafom me kondan fäkiälik e primikom kögön. Lunikans primikoms spikön tefü jiel ‚Nadezhda Petrovna‘ anik. ‚lona‘ pödiologom lü oms. Efistebedölo paudi brefik, pödiologom nogna e tisagom:

„Pö ob avigo... son ideadom!”

„Valikans udeadons...“, gobadan seifom, deluröbölo lipis pos kög. „Gö, vifikumolöd, vifikumolöd! O hisiörs, ebo no kanob ad vegön so! Kitimo ulüblinol obis?”

„Kuradükobös omi bosilo... pö särvig!”

Fövoti konota reidolsös in nüm sököl.

Sevols-li, das ... Gabunän



1) Gabunän binon län in Frikop Zänodik ä bal länas benolabikün (danädü davedöps petrolik ä gasinik) e laidulikün Frikopa.



2) Gabunän idage-ton libi de Fransän ün yel 1960. Ettimo cifazif ‚Libreville‘ älabon belödanis te 32000, siso mödot belödanas vemo vifiko äpluikon ed anu leigon ze 800000 (ti laf mödota belödanas läna).


3) Gabunänans ti neai labons kati as nim teamik.

4) Nim sevädikün Gabunäna binon lep luputik lunotik mö läs zimmets deglul.



5) Gabunän pinemon fa Portugänans ün yel 1472 kel ituvons oni as Yuropans balid. Käpten hiel ‚Rui de Sequeira‘ ituvom bugi keli inemom me nem ‚Gabon‘ (de vöd Portugänapük ‚gabão‘ kel sinifon ‚plögun ko kapütül‘ bi bug labon fomi sümedöl atosi).

6) Gabunän binon motedalän vogädijonana jiel ,Reine Ngotala’.



Säkis, küpetis e lofotis aliks ä materis e volanuns nitediks kanols lüsedön lü penedabog «komunan@yandex.ru».